

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ১১৩/২০১৭

ঢাকা, বৃহস্পতিবার ৮ জুন ২০১৭, ২৫ জ্যৈষ্ঠ ১৪২৪

আজকের দৈনিক পত্রিকাগুলো নিম্নলিখিত বিষয়গুলোকে প্রাধান্য দিয়ে খবর ছেপেছে :

- ১। বিএনপি ঘোষিত 'রূপকল্প ২০৩০' আওয়ামী লীগের 'রূপকল্প ২০২১'-এর প্রতিচ্ছবি : সংসদে প্রধানমন্ত্রী
- ২। বাংলাদেশ রেলওয়েতে ৯৭ হাজার কোটি টাকার প্রকল্প বাস্তবায়ন করা হচ্ছে : সংসদে প্রধানমন্ত্রী
- ৩। রামপাল বিদ্যুৎকেন্দ্র নিয়ে মানুষকে বিভ্রান্ত করা হচ্ছে : প্রধানমন্ত্রী
- ৪। ঐতিহাসিক ছয় দফা দাবি দিবসে বঙ্গবন্ধুর প্রতিকৃতিতে প্রধানমন্ত্রীর শ্রদ্ধা
- ৫। সরকারি অর্থ ব্যয়ের স্বচ্ছতা নিশ্চিত করুন : রাষ্ট্রপতি
- ৬। কাতার সংকট বাংলাদেশের শ্রমবাজারের ওপর প্রভাব ফেলবে না : প্রবাসীকল্যাণ মন্ত্রী
- ৭। গত আট বছরে সারে ভর্তুকি ৫৫ হাজার কোটি টাকা : সংসদে কৃষিমন্ত্রী
- ৮। পর্যটন খাতে গত আট বছরে আয় সাড়ে ৬ হাজার কোটি টাকা : সংসদে বিমানমন্ত্রী
- ৯। দেশে ৬৫ শতাংশ ইটভাটা পরিবেশবান্ধব ইটভাটায় রূপান্তরিত হয়েছে : পরিবেশমন্ত্রী
- ১০। রাঙ্গামাটির লংগদুর ঘটনায় জড়িতরা শাস্তি পাবে : স্বাস্থ্যমন্ত্রী
- ১১। দেশজুড়ে স্কুলে সাংস্কৃতিক চর্চা কার্যক্রম শুরু হচ্ছে : সংস্কৃতিমন্ত্রী
- ১২। মৌচাক ফ্লাইওভারের গার্ডার পড়ে হতাহতদের পরিবারকে কেন ক্ষতিপূরণ নয় : হাইকোর্টের রুল

১। বিএনপি ঘোষিত 'রূপকল্প ২০৩০' আওয়ামী লীগের 'রূপকল্প ২০২১'-এর প্রতিচ্ছবি
: সংসদে প্রধানমন্ত্রী

প্রধানমন্ত্রী শেখ হাসিনা বলেছেন, বিএনপি ঘোষিত 'রূপকল্প ২০৩০'এর অধিকাংশই বর্তমান (আওয়ামী লীগ) সরকার পূরণ করেছে। এটি আওয়ামী লীগের 'রূপকল্প ২০২১'-এর প্রতিচ্ছবি। গতকাল ৭ জুন বুধবার দশম জাতীয় সংসদের ১৬তম (বাজেট) অধিবেশনের ৬ষ্ঠ কার্যদিবসে প্রধানমন্ত্রীর জন্য নির্ধারিত প্রশ্নোত্তর পর্বে সরকারি দলের বেগম ফজিলাতুন নেসা বাপ্পির এক প্রশ্নের জবাবে তিনি এ কথা বলেন।

তিরিকত ফেডারেশনের সদস্য এমএ আউয়ালের এক প্রশ্নের জবাবে প্রধানমন্ত্রী বলেন, পবিত্র রমজান মাস উপলক্ষে দেশে নিত্যপ্রয়োজনীয় দ্রব্যমূল্য নিয়ন্ত্রণে রাখার লক্ষ্যে বিভিন্ন পদক্ষেপ গ্রহণ করা হয়েছে।

প্রধানমন্ত্রী জননিরাপত্তা নিশ্চিত সংক্রান্ত প্রশ্নের জবাবে বলেন, জনগণের নিরাপত্তা নিশ্চিতকল্পে বিভিন্ন ব্যবস্থা নেওয়া হয়েছে। রমজান মাস ও ঈদ উপলক্ষে সড়ক, নৌ ও রেলপথ যানজটমুক্ত রাখার লক্ষ্যে বাংলাদেশ পুলিশ ব্যাপক প্রস্তুতি গ্রহণ করেছে। প্রধানমন্ত্রী বলেন, জনগণের চলাচল নির্বিঘ্ন করতে ব্যবস্থা নেওয়া হয়েছে। সড়ক ও মহাসড়ক বিভাগ পবিত্র রমজান ও আসন্ন ঈদুল ফিতর উপলক্ষে মহাসড়ক পথে যাতায়াত নিরাপদ করার লক্ষ্যে ২৯ দফা নির্দেশনা সংবলিত পত্র জারি করেছে। সূত্র-সংবাদ (শেষ পৃ.,ক.৫), ইত্তেফাক (পৃ.১,ক.৭), ডেইলি স্টার (পৃ.৩,ক.১), নিউজ টুডে (পৃ.১,ক.৮)।

২। বাংলাদেশ রেলওয়েতে ৯৭ হাজার কোটি টাকার প্রকল্প বাস্তবায়ন করা হচ্ছে : সংসদে প্রধানমন্ত্রী

প্রধানমন্ত্রী শেখ হাসিনা বলেন, বাংলাদেশ রেলওয়েতে ৯৭ হাজার ৬২৩ কোটি ৪৭ লাখ টাকা ব্যয়ে মোট ৫৩টি (বিনিয়োগ প্রকল্প ৪৬ টি, কারিগরি সহায়তা প্রকল্প ৭টি) প্রকল্প বাস্তবায়ন করা হচ্ছে। ৫৩টি প্রকল্পের অনুকূলে ২০১৬-১৭ অর্থবছরের সংশোধিত বার্ষিক উন্নয়ন কর্মসূচিতে (আরএডিপি) ৯ হাজার ২৭৮ কোটি টাকা বরাদ্দ প্রদান করা হয়েছে। তিনি বলেন, ২০ বছর মেয়াদি ২০১০ সালের জুলাই থেকে ২০৩০ সালের জুন পর্যন্ত মহাপরিকল্পনা ৪টি পর্যায়ে বাস্তবায়নের জন্য ২ লাখ ৩৩ হাজার ৯৪৪ কোটি টাকা ব্যয়ে ২৩৫টি প্রকল্প অন্তর্ভুক্ত রয়েছে। বর্তমানে মহাপরিকল্পনা হালনাগাদ করার কার্যক্রম চলছে। প্রধানমন্ত্রী বলেন, প্রতিবেশী দেশের সঙ্গে রেল যোগাযোগ বাড়ানোর লক্ষ্যে ভারত, মায়ানমার, নেপাল ও ভুটানের সঙ্গে রেল যোগাযোগ বৃদ্ধির জন্যও বিভিন্ন পদক্ষেপ নেওয়া হয়েছে। সরকারি দলের সদস্য মো. মনিরুল ইসলামের এক প্রশ্নের জবাবে প্রধানমন্ত্রী সংসদে এসব কথা বলেন। সূত্র-সংবাদ (পৃ.২,ক.২), বাংলাদেশ টুডে (পৃ.১,ক.৬), ইন্ডিপেনডেন্ট (শেষ পৃ.,ক.৭), ডেইলি স্টার (পৃ.৩,ক.১)।

৩। রামপাল বিদ্যুৎকেন্দ্র নিয়ে মানুষকে বিভ্রান্ত করা হচ্ছে : প্রধানমন্ত্রী

রামপাল বিদ্যুৎকেন্দ্র নির্মাণের বিষয়ে প্রধানমন্ত্রী শেখ হাসিনা বলেছেন, একটি মহল ভিত্তিহীন, কাল্পনিক ও মনগড়া বক্তব্য দিয়ে সুন্দরবন ধ্বংস হবে বলে গণমাধ্যমে তথ্য প্রচার করে মানুষকে বিভ্রান্ত করছে। গতকাল জাতীয় সংসদে প্রশ্নোত্তর পর্বে সরকারি দলের মীর মোস্তাক আহমেদের প্রশ্নের জবাবে প্রধানমন্ত্রী এ কথা বলেন। তিনি বলেন, একটি কয়লাভিত্তিক বিদ্যুৎকেন্দ্রের ক্ষেত্রে প্রকল্পের জন্য সুবিধাজনক ও প্রয়োজনীয় জমির প্রাপ্যতা, নদীর নাব্যতা, কয়লা পরিবহনের সুবিধাদি, প্রয়োজনীয় পরিমাণ পানির উৎস বা জোগান, বিদ্যুৎ সঞ্চালন সুবিধা, ঘনজনবসতি পরিহার ও অভয়ারণ্য থেকে নিরাপদ দূরত্বে অবস্থান ইত্যাদি বিবেচনা করা হয়। প্রধানমন্ত্রী বলেন, প্রাথমিকভাবে নির্বাচিত তিনটি জায়গার মধ্যে পরিবেশগত এবং অন্যান্য সার্বিক দিক দিয়ে সবচেয়ে সুবিধাজনক ও গ্রহণযোগ্য হওয়ায় ১ হাজার ৩২০ মেগাওয়াট বিদ্যুৎ কেন্দ্রটি নির্মাণের জন্য রামপালকে বেছে নেওয়া হয়েছে। রামপাল বিদ্যুৎকেন্দ্রে ৯০২ ফুট উচ্চতার চিমনি ব্যবহৃত হবে, যার মাধ্যমে বিদ্যুৎকেন্দ্র থেকে পরিশোধিত বায়ু নির্গত হবে। ফলে আশপাশের এলাকাসহ পরিবেশের ওপর বিরূপ প্রভাব পড়ার আশঙ্কা নেই। সূত্র-প্রথম আলো (পৃ.২,ক.২), সমকাল (পৃ.১,ক.৫), ডেইলি স্টার (পৃ.৩,ক.১)।

৪। ঐতিহাসিক ছয় দফা দাবি দিবসে বঙ্গবন্ধুর প্রতিকৃতিতে প্রধানমন্ত্রীর শ্রদ্ধা

ঐতিহাসিক ছয় দফা দাবি দিবস উপলক্ষে বঙ্গবন্ধু শেখ মুজিবুর রহমানের প্রতিকৃতিতে ফুল দিয়ে শ্রদ্ধা জানিয়েছেন প্রধানমন্ত্রী শেখ হাসিনা। রাজধানীর ধানমন্ডিতে গতকাল বঙ্গবন্ধু স্মৃতি জাদুঘরের সামনে বঙ্গবন্ধুর প্রতিকৃতিতে ফুল দিয়ে শ্রদ্ধা জানিয়ে কিছু সময় নীরবে দাঁড়িয়ে থাকেন প্রধানমন্ত্রী। পরে দলীয় প্রধান হিসেবে জ্যেষ্ঠ নেতাদের নিয়ে পুষ্পস্তবক অর্পণ করেন। এ সময় তাঁর সঙ্গে দলীয় নেতারা উপস্থিত ছিলেন। সূত্র-প্রথম আলো (পৃ.২,ক.৪), ইন্ডিপেনডেন্ট (পৃ.৩,ক.১), ডেইলি সান (পৃ.৩,ক.১) এশিয়ান এজ (পৃ.১,ক.১)।

৫। সরকারি অর্থ ব্যয়ের স্বচ্ছতা নিশ্চিত করুন : রাষ্ট্রপতি

রাষ্ট্রপতি মো. আবদুল হামিদ সরকারি অর্থ ব্যয়ের স্বচ্ছতা ও জবাবদিহিতা নিশ্চিতকরণে সংশ্লিষ্ট কর্তৃপক্ষের প্রতি আহ্বান জানিয়েছেন। কম্পট্রোলার অ্যান্ড অডিটর জেনারেল অব বাংলাদেশ (সিএজি) মাসুদ আহমেদের নেতৃত্বে একটি প্রতিনিধি দল গতকাল বঙ্গভবনে রাষ্ট্রপতির কাছে বার্ষিক অডিট রিপোর্ট পেশকালে তিনি এ আহ্বান জানান। রাষ্ট্রপতি সরকারি ব্যয়ের অডিট আপত্তি রোধে কার্যকর পদক্ষেপ নেওয়ার জন্য বলেন। সূত্র-সমকাল (পৃ.৫,ক.১), বাংলাদেশ টুডে (পৃ.৩,ক.১), এশিয়ান এজ (পৃ.৩,ক.৫), নিউজ টুডে (পৃ.৩,ক.১)।

৬। কাতার সংকট বাংলাদেশের শ্রমবাজারের ওপর প্রভাব ফেলবে না : প্রবাসীকল্যাণ মন্ত্রী

প্রবাসী কল্যাণ ও বৈদেশিক কর্মসংস্থানমন্ত্রী নুরুল ইসলাম বিএসসি বলেছেন, কাতার সংকট বাংলাদেশের শ্রমবাজারের ওপর প্রভাব ফেলবে না। গতকাল ইস্কাটনের প্রবাসীকল্যাণ ভবনে প্রবাসীকল্যাণ ও বৈদেশিক কর্মসংস্থান মন্ত্রণালয়ের সভাকক্ষে আয়োজিত এক কর্মশালায় প্রধান অতিথির বক্তব্যে তিনি একথা বলেন। ‘বাংলাদেশের মহিলা অভিবাসী কর্মীদের চ্যালেঞ্জ’-শীর্ষক কর্মশালায় আয়োজন করে বাংলাদেশি অভিবাসী মহিলা শ্রমিক অ্যাসোসিয়েশন।

অপরদিকে কাতারের সঙ্গে সৌদি আরবসহ সাত দেশের কূটনৈতিক সম্পর্ক ছিন্নের ঘটনায় সেখানে অবস্থানরত বাংলাদেশি প্রবাসীদের কেউ কেউ উদ্বেগ প্রকাশ করলেও বেশিরভাগ বাংলাদেশিই স্বাভাবিক রয়েছেন। দোহার বাংলাদেশ দূতাবাস থেকে ইতোমধ্যে বাংলাদেশিদের আতঙ্কিত না হওয়ার জন্য পরামর্শ দেওয়া হয়েছে। সূত্র-যুগান্তর (পৃ.৩,ক.১), জনকণ্ঠ (পৃ.১,ক.১), বাংলাদেশ টুডে (পৃ.৩,ক.৭), ইন্ডিপেনডেন্ট (পৃ.১,ক.৩), নিউজ টুডে (শেষ পৃ.,ক.৫)।

৭। গত আট বছরে সারে ভর্তুকি ৫৫ হাজার কোটি টাকা : সংসদে কৃষিমন্ত্রী

কৃষিমন্ত্রী মতিয়া চৌধুরী বলেছেন, কৃষি উৎপাদন বৃদ্ধির লক্ষ্যে সরকার গত আট বছরে কেবল সারেই ভর্তুকি দিয়েছে ৫৫ হাজার ৯৯৮ কোটি টাকা। আর ডিজেলে ভর্তুকির পরিমাণ ৭৫০ কোটি টাকা। চলতি অর্থবছরের সংশোধিত বাজেটে কৃষিখাতে ছয় হাজার কোটি টাকা বরাদ্দ রাখা হয়েছে। গতকাল জাতীয় সংসদ অধিবেশনে টেবিলে উত্থাপিত প্রশ্নোত্তর পর্বে তিনি এসব কথা বলেন। সূত্র-সমকাল (পৃ.২,ক.৫), জনকণ্ঠ (পৃ.১,ক.৪)।

৮। পর্যটন খাতে গত আট বছরে আয় সাড়ে ৬ হাজার কোটি টাকা : সংসদে বিমানমন্ত্রী

পর্যটন খাতে গত আট বছরে প্রায় সাড়ে ছয় হাজার কোটি টাকা আয় হয়েছে বলে জাতীয় সংসদে জানিয়েছেন বেসামরিক বিমান ও পর্যটনমন্ত্রী রাশেদ খান মেনন। গতকাল সংসদে টেবিলে উত্থাপিত প্রশ্নোত্তর পর্বে সরকারদলীয় সংসদ সদস্য আ খ ম জাহাঙ্গীর হোসাইনের প্রশ্নের জবাবে মন্ত্রী এ তথ্য জানান। বিমানমন্ত্রী জানান, আগে কয়েক বছর ধারাবাহিকভাবে বাংলাদেশ বিমান লোকসান করলেও গত দুই অর্থবছরে বিমান লাভজনক প্রতিষ্ঠান হিসেবে পরিচিতি পেয়েছে। সূত্র-জনকণ্ঠ (পৃ.৩,ক.১), ইন্ডেক্সক (শেষ পৃ.,ক.৬), এশিয়ান এজ (পৃ.১১,ক.১)।

৯। দেশে ৬৫ শতাংশ ইটভাটা পরিবেশবান্ধব ইটভাটায় রূপান্তরিত হয়েছে : পরিবেশমন্ত্রী

পরিবেশ ও বনমন্ত্রী আনোয়ার হোসেন মঞ্জু সংসদকে জানিয়েছেন, দেশে বিদ্যমান ইটভাটার ৬৪ দশমিক ৮৫ শতাংশ আধুনিক প্রযুক্তির পরিবেশবান্ধব ইটভাটায় রূপান্তরিত হয়েছে। গতকাল সংসদে টেবিলে উপস্থাপিত

প্রশ্নোত্তরের সরকারি দলের সদস্য মাহমুদ উস সামাদ চৌধুরীর এক প্রশ্নের জবাবে তিনি একথা বলেন। একই প্রশ্নের জবাবে পরিবেশ মন্ত্রী জানান, ২০১৩ থেকে ২০১৭ সালের মার্চ পর্যন্ত ৫০৫টি ইটভাটার বিরুদ্ধে অভিযান চালিয়ে ১৩ কোটি ৯৮ লাখ টাকা ক্ষতিপূরণ ধার্য করা হয়। ২০১৪ সাল থেকে চলতি বছরের মার্চ পর্যন্ত ২৮৫ টি ইটভাটার বিরুদ্ধে অভিযান চালিয়ে ৩ কোটি ৪৫ লাখ টাকা আদায় করা হয়েছে। সূত্র-ইত্তেফাক (শেষ পৃ.,ক.১),

১০। রাঙ্গামাটির লংগদুর ঘটনায় জড়িতরা শাস্তি পাবে : স্বাস্থ্যমন্ত্রী

স্বাস্থ্যমন্ত্রী মোহাম্মদ নাসিম বলেছেন, রাঙ্গামাটির লংগদুতে অগ্নিসংযোগের ঘটনায় দোষী কাউকে ছাড় দেওয়া হবে না। প্রত্যেককে গ্রেফতার করে আইনানুগ কঠোর শাস্তি দেওয়া হবে। গতকাল ১৪ দলের উদ্যোগে লংগদুতে ক্ষতিগ্রস্ত এলাকা পরিদর্শন শেষে তিনি এসব কথা বলেন। সূত্র-ইত্তেফাক (শেষ পৃ.,ক.৬), সমকাল (পৃ.২,ক.১), বাংলাদেশ টুডে (পৃ.৩,ক.১), এশিয়ান এজ (শেষ পৃ.,ক.৮)।

১১। দেশজুড়ে স্কুলে সাংস্কৃতিক চর্চা কার্যক্রম শুরু হচ্ছে : সংস্কৃতিমন্ত্রী

সংস্কৃতিমন্ত্রী আসাদুজ্জামান নূর বলেছেন, স্কুলপড়ুয়া শিশু-কিশোরদের সাংস্কৃতিক পরিমণ্ডলে বেড়ে উঠবার ক্ষেত্র সৃষ্টি করতে সরকার দেশব্যাপী সাংস্কৃতিক কার্যক্রম শুরু করতে যাচ্ছে। হোলি আর্টজান, শোলাকিয়াসহ দেশের বিভিন্ন স্থানে জঙ্গি হামলার সাথে যারা জড়িত ছিল, তাদের অধিকাংশই তরুণ এবং তারা প্রায় সকলেই আধুনিক শিক্ষায় শিক্ষিত। কিন্তু তাদের ভেতরে কোনো সাংস্কৃতিক শিক্ষা ছিল না। শিশুদের মৌলবাদী আগ্রাসন থেকে দূরে রাখতে স্কুল থেকেই সাংস্কৃতিক আবহে গড়ে তুলবার এ পরিকল্পনা নেওয়া হয়েছে। এ উপলক্ষে গতকাল শিল্পকলা একাডেমির জাতীয় নাট্যশালা সেমিনার কক্ষে আয়োজিত সভায় সভাপতির বক্তব্যে তিনি এসব কথা বলেন। সূত্র-ইত্তেফাক (পৃ.৩,ক.২), সমকাল (পৃ.১৯,ক.৭), নিউজ টুডে (পৃ.২,ক.১)।

১২। মৌচাক ফ্লাইওভারের গার্ডার পড়ে হতাহতদের পরিবারকে কেন ক্ষতিপূরণ নয় : হাইকোর্টের রুল

রাজধানীর মৌচাক-মালিবাগ ফ্লাইওভারে গার্ডার ভেঙে নিহত শ্রমিকের পরিবারকে ৫০ লাখ এবং আহত ২ শ্রমিকের পরিবারকে ৩০ লাখ টাকা করে ক্ষতিপূরণ কেন দেওয়া হবে না তা জানতে চেয়ে রুল জারি করেছে হাইকোর্ট। গতকাল বিচারপতি সালমা মাসুদ চৌধুরী ও বিচারপতি একেএম জহিরুল হকের সম্মুখে গঠিত হাইকোর্ট ডিভিশন বেঞ্চ এ রুল জারি করে। সূত্র-যুগান্তর (পৃ.১৭,ক.৩), সমকাল (পৃ.৩,ক.১), ইন্ডিপেন্ডেন্ট (পৃ.৩,ক.২), ডেইলি স্টার (পৃ.৩,ক.১)।

সম্পাদকীয়

- ক. **ইত্তেফাক** : মাগুরায় পাঁচশত প্রাথমিক বিদ্যালয়ের মধ্যে ঝুঁকিপূর্ণ ৭২টি বিদ্যালয়ে ২০ হাজারের বেশি ছাত্র-ছাত্রীর ঝুঁকি নিয়ে পড়াশোনা করার বিষয় তুলে ধরে অতিক্রান্ত এসব বিদ্যালয়ের অবকাঠামো উন্নয়ন বা সংস্কারের সুপারিশ।
- খ. **সংবাদ** : সোলার প্যানেল ও মডিউল আমদানিতে ১০ শতাংশ শুল্ক আরোপের প্রস্তাবে সোলার প্যানেলের দাম ২৫ থেকে ৫০ শতাংশ বেড়ে যাওয়ার আশঙ্কায় এ ধরনের শুল্ক আরোপের প্রস্তাব প্রত্যাহার করার আহ্বান।
- গ. **প্রথম আলো** : ঈদের আগে রাজবাড়ীর দৌলতদিয়ায় নতুন দুটি ফেরিঘাট নির্মাণকাজে ধীরগতির কারণে চালু করা নিয়ে অনিশ্চয়তা দেখা দেওয়ায় নির্মাণকাজের গতি বাড়িয়ে ঈদের আগে ফেরিঘাট চালু করার উদ্যোগ নেওয়ার সুপারিশ।
- ঘ. **সমকাল** : অবিলম্বে রাজবাড়ীর গোয়ালন্দ উপজেলার দৌলতদিয়া ও দেবগ্রাম ইউনিয়ন দুটির নদীভাঙ্গন রোধে ব্যবস্থা নেওয়ার প্রত্যাশা ব্যক্ত।

=৫=

- ঙ. **ইন্ডিপেনডেন্ট** : ঢাকা ও চট্টগ্রামের বর্জ্য ব্যবস্থাপনায় প্রয়োজনীয় যন্ত্রপাতি ক্রয়ে একনেকে ১৬০.১২ কোটি টাকা বরাদ্দের অনুমোদন দেওয়ার বিষয় তুলে ধরে সঠিকভাবে বর্জ্য ব্যবস্থাপনার দ্বারা শহর পরিচ্ছন্ন ও বাস উপযোগী রাখতে সংশ্লিষ্ট সব সংস্থাকে সমন্বিতভাবে কাজ করার সুপারিশ।
- চ. **ডেইলি সান** : প্রাইভেট হাসপাতালে রোগীদের ওপর অতিরিক্ত চার্জ আদায় বন্ধে প্রাইভেট মেডিকেল সার্ভিস অ্যাক্ট ২০১৪ দ্রুত বাস্তবায়নের পদক্ষেপ নেওয়ার আহ্বান।
- ছ. **নিউজ টুডে** : ২০১৭-১৮ সালের প্রস্তাবিত বাজেটে কর্মসংস্থান নিয়ে সঠিক নির্দেশনা না থাকায় এ ব্যাপারে সরকারকে যথাযথ পদক্ষেপ নেওয়ার সুপারিশ।
- জ. **অবজারভার** : পার্বত্য চট্টগ্রামের রাঙামাটির লংগদু উপজেলার সংখ্যালঘু জনগোষ্ঠীর সঠিক নিরাপত্তা বিধানে প্রশাসনকে দ্রুত আইনি ব্যবস্থা জোরদার করার আহ্বান।
- ঝ. **নিউ এজ** : মাল্টিমিডিয়াভিত্তিক শিক্ষাব্যবস্থা নিশ্চিতকরণে মনিটরিং ব্যবস্থা জোরদার করার ওপর গুরুত্বারোপ করে সম্পাদকীয় প্রকাশ করেছে।

নিবন্ধ ও ফিচার

সংবাদ পত্রিকায় প্রকাশিত ‘কম ওজনের শিশুর জন্ম প্রসঙ্গে’ শিরোনামের নিবন্ধে অভিমত প্রকাশ করা হয়েছে, গর্ভবতী মায়ের যত্ন, পর্যাপ্ত সুস্বাদু খাবার এবং পর্যাপ্ত বিশ্রামের ব্যবস্থা করতে পারলে স্বাভাবিক ওজনের শিশুর জন্ম নেওয়ার সম্ভাবনা বেশি থাকে।

#

ফাহিমা/শুকলা/মরজিনা/রশীদ/তানিয়া/২০১৭/৯.০০ ঘণ্টা

